

## **Regulamento de estudos de doutoramento**

**(Aprobado polo Consello de Goberno do 17 de xullo de 2012. Modificados os artigos 36, 27 e disposición adicional terceira polo Consello de Goberno do 23 de abril de 2013)**

### **Exposición de motivos**

A Lei orgánica 6/2001, do 21 de decembro, de universidades, na súa nova redacción dada pola Lei orgánica 4/2007, do 12 de abril, pola que se modifica a anterior, define a estrutura das ensinanzas universitarias en tres ciclos: grao, mestrado e doutoramento. Os estudos de doutoramento, correspondentes ao terceiro ciclo, conducen á obtención do título oficial de doutor ou doutora. Segundo establece a citada lei, os estudos de doutoramento organizaranse e realizaranse na forma que determinen os estatutos das universidades, de acordo cos criterios que para a obtención do título de doutor aprobe o Goberno, logo do informe do Consello de Universidades.

O desenvolvemento do terceiro ciclo dentro da construción do Espazo Europeo de Educación Superior (EEES) debe ter presente as novas bases da Axenda Revisada de Lisboa, así como a construción do Espazo Europeo de Investigación (EEI) e os obxectivos trazados para este no Libro Verde de 2007. Deste xeito, o doutoramento debe xogar un papel fundamental como intersección entre o EEES e os EEI, ambos, alicerces fundamentais da sociedade baseada no coñecemento. A investigación debe ter unha clara importancia como parte integral da educación superior universitaria e a mobilidade debe ser valorada na etapa doutoral e posdoutoral como peza esencial na formación de novos investigadores.

A entrada en vigor do Real decreto 99/2011, do 28 de xaneiro, polo que se regulan as ensinanzas oficiais de doutoramento fixa un novo marco normativo para adaptar estas ensinanzas ao Espazo Europeo de Educación Superior, proceso iniciado no ano 1999 coa declaración de Boloña. Por outra banda, a publicación do Decreto 222/2011, do 2 de decembro, polo que se regulan as ensinanzas universitarias oficiais no ámbito da Comunidade Autónoma de Galicia fixa tamén requisitos adicionais para a proposta e implantación de novos estudos de doutoramento.

## **Capítulo preliminar. Principios xerais**

### **Artigo 1. Contexto legal**

Os estudos de doutoramento e a obtención do título de doutor/a na Universidade da Coruña rexeranse polo disposto na Lei orgánica 6/2011, do 21 de decembro, modificada pola Lei orgánica 4/2007, do 12 de abril, de universidades, e as súas normas de desenvolvemento, en especial, o Real decreto 99/2011, do 28 de xaneiro, polo que se regulan as ensinanzas oficiais

de doutoramento, os Estatutos da Universidade da Coruña e demais disposicións promulgadas polo Estado, adaptadas á Comunidade Autónoma de Galicia e á Universidade da Coruña, no ámbito das súas respectivas competencias, e en particular polo presente regulamento.

A Universidade da Coruña (UDC) elaborou unha normativa para Estudos de Doutoramento (establecidos no Real Decreto 1393/2007), aprobada no Consello de Goberno do 22 de maio de 2008, e posteriormente un Regulamento de estudos de doutoramento da UDC, aprobado no Consello de Goberno do 30 de outubro de 2008 e modificado por acordo do Consello de Goberno do 20 de decembro de 2011, que desenvolve a normativa mencionada. A modificación do marco regulador xeral para o desenvolvemento dos estudos oficiais de doutoramento que establece o Real decreto 99/2011, supón a necesidade de modificar estas normas reguladoras dos estudos de doutoramento da UDC para adaptalas ao novo marco legal.

## **Artigo 2. Ámbito de aplicación**

A presente normativa ten por obxecto regular a organización dos estudos de doutoramento conducentes á obtención do título de doutor ou doutora na Universidade da Coruña que terá carácter oficial e validez en todo o territorio nacional.

# **Capítulo 1. Estudos de doutoramento**

## **Artigo 3. Estrutura dos estudos de doutoramento**

Os estudos de doutoramento organizaranse a través de programas de doutoramento, na forma en que determinen os Estatutos da Universidade da Coruña e de acordo cos criterios establecidos no Real decreto 99/2011. Os devanditos estudos finalizarán en todo caso coa elaboración e defensa dunha tese de doutoramento que incorpore resultados orixinais de investigación.

Os programas de doutoramento incluírán aspectos organizados de formación investigadora que non requirirán a súa estruturación en créditos ECTS e comprenderán tanto a formación transversal como a específica no ámbito de cada programa, aínda que, en todo caso, a actividade esencial do/a doutorando/a será a investigación

Sexa como for, a memoria de verificación do programa de doutoramento recollerá a relación de actividades formativas, con indicación expresa, se for o caso, daquelas que son de carácter obrigatorio para todo o alumnado do programa de doutoramento.

# **Capítulo 2. Organización dos estudos de doutoramento**

## **Artigo 4. Organización a través das escolas de doutoramento**

As escolas de doutoramento asumen a organización, planificación, xestión, supervisión e seguimento da oferta global de actividades propias do doutoramento na universidade. A súa finalidade será concibir un modelo de formación doutoral flexible, interdisciplinar e de calidade, orientado a potenciar as liñas de investigación de maior interese e proxección da universidade. A creación das ditas escolas deberá ser aprobada conforme ao establecido no artigo 8 da LOU.

En aras de incrementar a calidade da oferta de doutoramento, as escolas de doutoramento poderán contar coa colaboración doutras universidades, organismos, centros, institucións e entidades con actividades de I+D+i, públicas ou privadas, nacionais ou estranxeiras. A participación destas entidades externas requirirá a aprobación do Consello de Goberno, logo do informe favorable da vicerreitoría competente na materia.

Todos os programas de doutoramento da universidade deberán estar adscritos necesariamente a unha escola de doutoramento en que participe institucionalmente a propia universidade.

As escolas de doutoramento, de acordo co Real decreto 99/2011, contarán cun comité de dirección que realizará as funcións relativas á súa organización e xestión, e estará composto cando menos polo seu director/a, as persoas coordinadoras dos seus programas de doutoramento e os/as representantes das entidades colaboradoras. O/a director/a dunha escola será nomeado/a polo reitor e debe ser un investigador de recoñecido prestixio pertencente aos corpos docentes da universidade. Esta condición debe estar avalada pola xustificación da posesión de, cando menos, tres períodos de actividade investigadora recoñecidos de acordo coas previsións do Real decreto 1086/1989, do 28 de agosto.

As escolas de doutoramento regularanse polo establecido nos Estatutos da universidade e neste regulamento e contarán cun regulamento de réxime interno.

A universidade habilitará a infraestrutura e os recursos que considerar oportunos para dotar as escolas de doutoramento da capacidade requirida co fin de desenvolver as súas funcións. Especificamente, as escolas disporán dunha oficina de doutoramento, servizo que contará co persoal de administración e servizos necesario para desenvolver as funcións de xestión administrativa e económica dos programas de doutoramento da escola, con todos aqueles labores específicos que se establezan no regulamento de réxime interno das escolas.

Forman parte dunha escola de doutoramento o persoal docente e investigador con funcións de titorización e dirección de teses doutorais nos programas de doutoramento dependentes da escola, os doutorandos matriculados neles, o persoal de administración e servizos alí destinado, o seu director ou directora e demais compoñentes do seu comité de dirección, e os membros das comisións académicas dos programas de doutoramento dependentes da escola. As escolas de doutoramento contarán cun código de boas prácticas que deberán subscribir todos os seus integrantes.

## **Capítulo 3. Organización dos programas de doutoramento**

### **Artigo 5. Comisión académica do programa de doutoramento**

Cada programa de doutoramento contará cunha comisión académica do programa de doutoramento (en adiante CAPD), en calidade de órgano responsable do seu deseño, implantación, actualización, organización, calidade e coordinación.

A CAPD estará integrada por un mínimo de sete membros entre os cales deberán figurar o/a presidente/a e o/a secretario/a, e será nomeada polo reitor.

No caso de programas de doutoramento interuniversitarios, ou programas en que participen organismos, entidades, centros ou institucións con actividades de I+D+i, a composición da CAPD será a que figure no correspondente convenio de colaboración. En calquera caso, a composición da CAPD deberá contar con cando menos un membro de cada unha das universidades responsables do desenvolvemento do programa.

A CAPD estará integrada por doutores/as con vinculación permanente coa universidade e dedicación a tempo completo, en posesión de, polo menos, un período de actividade investigadora recoñecida de acordo co RD 1986/1989. No caso de programas de doutoramento que contén coa colaboración doutros organismos, centros, institucións e entidades con actividades de I+D+i, públicos, privados, nacionais ou estranxeiros, poderán formar parte da CAPD persoal investigador vinculado contractualmente cos devanditos organismos, sempre que acredite cumprir os mesmos requisitos que o persoal investigador adscrito á universidade ou méritos equiparables no caso de que non resulte de aplicación a posesión do período de actividade investigadora. A totalidade dos membros da CAPD deberá constar como profesorado asignado ao programa de doutoramento.

Un dos membros da CAPD actuará de secretario para os efectos de dar fe dos acordos adoptados pola comisión e redactar as actas das sesións da CAPD.

Os membros da CAPD serán renovados, con carácter xeral, cada catro anos

## **Artigo 6. Competencias da comisión académica**

Son funcións da comisión académica dun programa de doutoramento as seguintes:

Deseñar, organizar, coordinar e propor ao órgano responsable dos estudos de doutoramento na universidade o conxunto de actividades que conforman o programa, incluídas as liñas de investigación, actividades formativas, relación de persoal investigador que asumirá a titoría e a dirección de teses de doutoramento, criterios de admisión e selección do alumnado e toda canta información for requirida polo órgano responsable dos estudos de doutoramento na universidade en cumprimento da normativa vixente.

Manter actualizada a información referente ao programa de doutoramento e informar a este respecto ao órgano responsable dos estudos de doutoramento na universidade nos prazos e procedemento establecidos.

Realizar o proceso de valoración de méritos e admisión do alumnado no programa de doutoramento, mediante a aplicación dos criterios e procedementos de selección establecidos na memoria de verificación, que serán públicos.

Asignar ao alumno admitido no programa un titor ou titora e, no prazo máximo de tres meses despois de formalizar a súa matrícula, un director/a. Tamén lle compete á CAPD a modificación destes nomeamentos e, se for o caso, a autorización da codirección da tese cando concorran razóns de índole académica que o xustifiquen.

Establecer, se procede, os complementos específicos de formación que o alumnado debe cursar para ser admitido no programa de doutoramento.

Establecer, se procede, os requisitos de formación transversal e de formación específica no ámbito do programa que o alumno debe cursar tras ser admitido no programa de doutoramento.

Realizar anualmente a avaliación do documento de actividades e do plan de investigación de cada doutorando, tendo en conta os informes que para tal efecto deberán emitir o/a titor/a e o director/a.

Autorizar as estadías e as actividades fóra de España en institucións de ensinanza superior ou centros de investigación de prestixio, necesarias para a inclusión da mención internacional no título de doutor/a. Tales estadías e actividades deberán ser previamente informadas e avaladas polo/a director/a e o titor/a.

Autorizar a realización de estudos de doutoramento a tempo parcial no seu programa cando proceda.

Autorizar, de se lo caso, as prorrogas na duración dos estudos de doutoramento e a concesión de baixas temporais, segundo o disposto no RD 99/2011 e nos artigos 26 e 27 deste regulamento.

Facer as propostas de modificación e/ou suspensión/extinción do programa, que serán remitidas ao órgano responsable dos estudos de doutoramento na universidade para súa valoración.

Proporcionar asesoramento académico e/ou científico a doutorandos e a directores de teses.

Emitir o informe de autorización de inicio de trámite para a presentación e exposición pública da tese de doutoramento e aprobar, de ser o caso, os requisitos de calidade das teses de doutoramento.

Elaborar a memoria para a verificación e/ou modificación do programa de doutoramento segundo a normativa vixente.

Calquera outra función que lle encomende o órgano responsable dos estudos de doutoramento na universidade ou se lle asigne en cumprimento do presente regulamento e demais disposicións legais vixentes.

## **Artigo 7. Coordinador/a do programa de doutoramento**

Cada programa de doutoramento deberá contar cun coordinador/a, designado/a polo reitor, que presidirá a comisión académica do programa de doutoramento, que cumpra conxuntamente os seguintes requisitos: (i) ter dirixido ou codirixido polo menos dúas teses de doutoramento, (ii) estar en posesión de, polo menos, dous períodos de actividade investigadora recoñecidos de acordo co RD 1986/1989 e ter vinculación permanente coa universidade e dedicación a tempo completo. O/a coordinador/a só poderá exercer as funcións derivadas do seu cargo nun único programa de doutoramento.

No caso de programas interuniversitarios a designación do/a coordinador/a será por acordo entre reitores cando se trate de programas conxuntos ou no modo indicado no convenio con outras institucións cando se desenvolva en colaboración con elas.

### **Artigo 8. Profesorado do programa de doutoramento**

Todo o profesorado do programa de doutoramento debera estar en posesión do título de doutor/a, sen prexuízo da posible colaboración en determinadas actividades específicas doutras persoas ou profesionais en virtude da súa relevante cualificación científica ou profesional no correspondente ámbito de coñecemento.

Así mesmo, será factible incorporar ao programa persoal docente ou investigador alleo á propia universidade. En tal caso, a CAPD acreditará esta condición e garantirá os recursos necesarios para estas incorporacións o cal deberá comunicalo á universidade.

Un profesor/investigador só poderá estar asignado con carácter xeral a un programa de doutoramento, sen prexuízo de que poida colaborar en actividades formativas doutros programas como convidado. Excepcionalmente, en casos xustificados de desenvolvemento ou participación en dúas liñas de investigación diferenciadas, poderase permitir a asignación do profesor/investigador en dous programas de doutoramento.

### **Artigo 9. Tutores do programa de doutoramento**

A admisión definitiva dun doutorando nun programa de doutoramento leva a asignación dun titor ou titora, designado/a pola CAPD correspondente. Tratarase dun profesor asignado ao programa con vinculación permanente coa universidade e/ou entidade colaboradora no programa de doutoramento.

Con carácter xeral, o/a titor/a terá como labores: (i) velar pola interacción do doutorando coa CAPD e, conxuntamente, co director da tese; (ii) velar pola adecuación ás liñas do programa da formación e a actividade investigadora do doutorando e (iii) orientar o doutorando nas actividades docentes e de investigación do programa.

A CAPD, oído o doutorando, poderá modificar o nomeamento do titor en calquera momento do período de realización do doutoramento, sempre que concorran razóns xustificadas.

O labor de tutorización será recoñecida como parte da dedicación docente e investigadora do profesorado.

### **Artigo 10. Directores da tese de doutoramento**

No prazo máximo de tres meses desde a súa matriculación, a CAPD asignará a cada doutorando un director/a de tese de doutoramento quen será o máximo responsable da coherencia e idoneidade das actividades de formación, do impacto e novidade no seu campo da temática da tese de doutoramento e da guía na planificación e a súa adecuación, no seu caso, á doutros proxectos e actividades onde se inscriba o doutorando.

Poderá ser director/a da tese calquera doutor/a español/a ou estranxeiro/a, con experiencia acreditada investigadora, con independencia da universidade, centro ou institución en que preste os seus servizos. Para efectos desta normativa, por acreditada *experiencia investigadora* enténdese o cumprimento dalgún dos seguintes requisitos:

Ter recoñecido polo menos un sexenio de actividade investigadora

Ser, nos últimos seis anos, investigadora ou investigador principal dun proxecto de investigación financiado mediante convocatoria pública (excluídos os proxectos de convocatorias propias da universidade)

Acreditar a autoría ou coautoría, nos últimos seis anos, de polo menos tres publicacións en revistas incluídas no *Journal Citation Reports*. Naquelas áreas en que pola súa tradición non sexa aplicable este criterio substituirase por un requisito comparable segundo o establecido pola Comisión Nacional Avaliadora da Actividade Investigadora (CNEAI) nestes campos científicos.

Acreditar a autoría ou coautoría dunha patente en explotación

Ter dirixido unha tese de doutoramento nos últimos cinco anos coa cualificación de *Sobresaliente Cum Laude* ou *Apto Cum Laude* que dese lugar, polo menos, a unha publicación en revistas indexadas no ISI-JCR ou algunha contribución relevante no seu campo científico segundo os criterios da Comisión Nacional Avaliadora da Actividade Investigadora (CNEAI)

No caso de que un profesor ou profesora do programa cumpra os requisitos para ser director/a e titor/a asumirá as dúas funcións.

No caso que o/a director/a non teña vinculación permanente coa universidade ou entidade colaboradora do programa ou non sexa docente do programa, a CAPD asignará un titor que cumpra os requisitos establecidos no artigo 9 deste regulamento.

A CAPD, ouvido o doutorando, poderá modificar o nomeamento do/a director/a de tese en calquera momento do período de realización do doutoramento, sempre que concorran razóns xustificadas.

A tese poderá ser codirixida cando concorran razóns de índole académica ou cando a interdisciplinariedade temática ou os programas desenvolvidos en colaboración nacional ou internacional así o xustifiquen. En todo caso a codirección deberá ser previamente autorizada pola CAPD e tal autorización poderá ser revogada con posterioridade se, a xuízo da CAPD, a codirección non beneficia o desenvolvemento da tese. Os codirectores da tese deberán cumprir os mesmos requisitos que os establecidos para os directores no presente regulamento.

O labor de dirección de tese será recoñecida como parte da dedicación docente e investigadora do profesorado.

## **Capítulo 4. Novas propostas de programas de doutoramento e modificación das existentes**

### **Artigo 11. Presentación e tramitación das propostas**

O calendario e procedemento de aprobación no seo de cada universidade de novas propostas de programas de doutoramento e/ou modificación dos existentes será establecido anualmente en cada universidade. O calendario será consensuado anualmente entre as universidades do Sistema Universitario Galego (SUG) co fin de facilitar a xestión administrativa e académica de elaboración e aprobación das propostas.



A proposta dun programa de doutoramento presentarase ante o órgano responsable dos estudos de doutoramento na universidade a iniciativa dun ou varios grupos de investigación (ou agrupación de investigadores) ou o equipo de goberno, e materializarase na presentación dunha declaración de intencións que conteña a información básica da proposta do proxecto formativo co fin de valorar o seu alcance. Na declaración de intencións debe figurar a proposta da composición inicial da CAPD.

A proposta de modificación dun programa de doutoramento será presentada ante o órgano responsable dos estudos de doutoramento na universidade a iniciativa da CAPD e materializarase na presentación dunha declaración de intencións segundo o formato establecido para tal efecto.

A universidade poderá establecer criterios e requisitos de avaliación das propostas en exercicio da súa responsabilidade na planificación da súa oferta dos estudos de doutoramento.

Unha vez que se reciban as declaracións de intencións, o órgano responsable dos estudos de doutoramento na universidade valorará o cumprimento dos requisitos xerais establecidos no artigo 4 do Decreto 222/2011 da Comunidade Autónoma de Galicia e a súa adecuación aos principios da estratexia en materia de I+D+i e da formación doutoral da universidade, para o cal emitirá, sobre a base desta valoración, un informe favorable ou desfavorable sobre cada declaración.

No caso de novas propostas a emisión dun informe favorable implica o nomeamento formal da Comisión Académica do Programa de Doutoramento e faculta a esta para desenvolver a proposta definitiva nos termos fixados polo Consello de Universidades, a Comunidade Autónoma e pola propia universidade.

Unha vez aprobada por parte da CAPD a proposta definitiva do programa de doutoramento (que incluíra, polo menos, a proposta da memoria segundo o formato establecido para tal efecto e o conxunto de documentos que definen e sustentan o proxecto formativo), a proposta será sometida a informe do órgano responsable dos estudos de doutoramento na universidade, logo de ser exposta publicamente á comunidade universitaria segundo o procedemento e calendario establecido para tal efecto, e a aprobación do Consello de Goberno e Consello Social da Universidade.

## **Artigo 12. Dos programas de doutoramento conxuntos**

As universidades poderán organizar con outras universidades, nacionais ou estranxeiras, mediante a subscrición dun convenio, programas de doutoramento conducentes á obtención dun único título de doutor/a. O convenio asinado para tal efecto considerará, polo menos: (i) a relación de universidades participantes con indicación expresa da universidade que asume a coordinación do programa, (ii) a composición da comisión académica do programa de doutoramento e subcomisións delegadas en cada universidade e funcións de ambos os órganos (iii) a descrición da mobilidade de alumnado e/ou profesorado, (iv) a matrícula e custodia dos expedientes, (v) a universidade responsable da expedición e rexistro do título de doutor/a, (vi) o procedemento de modificación e/ou extinción do programa de doutoramento, (vii) o réxime de xestión de recursos económicos do programa. Co fin de facilitar a xestión dos programas de doutoramento de carácter interuniversitario, as universidades do SUG comprometeranse a aprobar un modelo tipo de convenio de colaboración que recolla os acordos relativos aos termos a que se refire o parágrafo anterior.



As universidades participantes recoñecerán para efectos académicos e administrativos as actividades formativas do programa de doutoramento cursadas en calquera das universidades participantes nos termos que figuran na correspondente memoria de verificación do título.

No caso de programas de doutoramento organizados de forma conxunta por universidades do SUG deberá presentarse a correspondente declaración de intereses en cada unha das universidades participantes a iniciativa dun ou varios grupos de investigación das universidades participantes. Unha vez recibida a declaración de intereses dun programa de doutoramento interuniversitario, esta será valorada polo órgano responsable dos estudos de doutoramento en cada unha das universidades participantes. A emisión de informe favorable por parte de todas as universidades participantes será requisito indispensable para continuar co desenvolvemento da proposta do programa de doutoramento.

Unha vez aprobada por parte da CAPD a proposta definitiva do programa de doutoramento (que inclúe polo menos a proposta de memoria –segundo o formato establecido–, a proposta de convenio de colaboración e o conxunto de documentos que definen e sustentan o proxecto formativo), esta será sometida a informe do órgano responsable dos estudos de doutoramento en cada universidade e a aprobación do Consello de Goberno e Consello Social das universidades participantes.

A comisión académica dun programa de doutoramento de carácter interuniversitario estará integrada por unha representación equilibrada das universidades participantes no programa e os seus membros deben cumprir os mesmos requisitos que os establecidos para os membros das comisións académicas dos programas de doutoramento organizados só pola Universidade da Coruña. Na declaración de intereses debe constar a universidade que asume a coordinación do programa e os datos do/a coordinador/a xeral e coordinador/es local/locais en cada universidade.

É competencia e responsabilidade da universidade coordinadora asumir as seguintes funcións, ademais das que figuren no correspondente convenio de colaboración do programa:

Coordinar o proceso de elaboración e aprobación do programa de doutoramento tratando de asegurar a participación proactiva e equilibrada das universidades participantes.

Realizar as xestións e trámites administrativos en relación ao procedemento de autorización ante a comunidade autónoma e verificación ante o Consello de Universidades, así como informar ás universidades participantes do estado dos citados procedementos.

Promover o convenio de colaboración do programa de doutoramento

Remitir ás universidades participantes os informes de avaliación e/ou autorización emitidos por ACSUG, polo departamento competente en materia de universidades da comunidade autónoma e polo Consello de Universidades, así como os documentos que conformen a memoria do programa unha vez autorizado e verificado o mesmo.

Coordinar os procedementos de seguimento e renovación da acreditación do programa de doutoramento.

Coordinar, de ser o caso, o procedemento de modificación e/ou extinción do programa de doutoramento.

### **Artigo 13. Acreditación dos programas de doutoramento**

Conforme ao disposto no artigo 24.2 do RD 1393/2007 e o artigo 10.3 do RD 99/2011, cada seis anos, contados desde a data da súa verificación inicial ou desde a da súa última acreditación, os programas de doutoramento deberán someterse a un procedemento de avaliación para renovar a súa acreditación de acordo co procedemento e prazos que a Comunidade Autónoma de Galicia estableza.

### **Artigo 14. Extinción dos programas de doutoramento**

Un programa de doutoramento extinguirase por algunha das seguintes causas:

Que non supere o proceso de renovación da acreditación establecido no artigo 10 do RD 99/2011.

Que non acredite o cumprimento dos requisitos básicos que o Goberno estableza de conformidade co disposto na Lei orgánica 6/2001, de universidades.

Que non cumpra os requisitos establecidos no artigo 6 do Decreto 222/2011 ou se vexa afecto polo disposto no artigo 18 do devandito decreto.

Que se formule proposta de extinción do programa ao abeiro dos procesos de revisión e mellora do título de acordo coa sistemática aprobada pola Universidade da Coruña.

Cando concorra calquera situación excepcional que impida o correcto desenvolvemento do programa de doutoramento.

A extinción producirá os seguintes efectos:

A perda do seu carácter oficial e a baixa no Rexistro de Universidades, Centros e Títulos (RUCT).

Non se poderá proceder á matriculación de novo alumnado no programa de doutoramento.

A extinción non afectará ao estudantado matriculado con anterioridade e que se atope cursando estudos no momento da adopción da decisión de extinción. En calquera caso todo o alumnado afectado deberá ser informado da extinción e das súas consecuencias no relativo ao desenvolvemento dos seus estudos.

A universidade adoptará as medidas necesarias para garantir os dereitos académicos do estudantado que se atope cursando os ditos estudos nos termos establecidos na resolución de extinción dos plans de estudo e aprobará o procedemento de extinción dos programa de doutoramento no seo da universidade.

## **Capítulo 5. Acceso e admisión en estudos de doutoramento**

### **Artigo 15. Acceso**

Son requisitos de acceso a un programa de doutoramento os seguintes:

1. Con carácter xeral, para o acceso a un programa oficial de doutoramento será necesario estar en posesión dos títulos oficiais españois de grao, ou equivalente, e de mestrado universitario.

2. Así mesmo, poderán acceder quen se atope nalgún dos seguintes supostos:

Estar en posesión dun título universitario oficial español, ou doutro país integrante do Espazo Europeo de Educación Superior, que habilite para o acceso a mestrado de acordo co establecido no artigo 16 do RD 1393/2007 e superar un mínimo de 300 créditos ECTS no conxunto de estudos universitarios oficiais, dos que, polo menos 60, terán que ser de nivel de mestrado.

Estar en posesión dun título oficial español de graduado ou graduada, cuxa duración, conforme a normas de dereito comunitario, sexa de polo menos 300 créditos ECTS. Os devanditos titulados deberán cursar con carácter obrigatorio os complementos de formación requiridos polo programa, agás que o plan de estudos do correspondente título de grao inclúa créditos de formación en investigación equivalentes en valor formativo aos créditos en investigación procedentes de estudos de mestrado.

Os titulados universitarios que, logo da obtención de praza en formación na correspondente proba de acceso a prazas de formación sanitaria especializada, superen con avaliación positiva polo menos dous anos de formación dun programa para a obtención do título oficial dalgunha das especialidades en ciencias da saúde.

Estar en posesión dun título obtido conforme a sistemas educativos estranxeiros, sen necesidade da súa homologación, logo de que a universidade comprobe que este acredita un nivel de formación equivalente á do título oficial español de mestrado universitario e que faculta no país expedidor do título para o acceso a estudos de doutoramento. Esta admisión non implicará, en ningún caso, a homologación do título previo do que estea en posesión a persoa interesada nin o seu recoñecemento para outros efectos que o do acceso a ensinanza de doutoramento.

Estar en posesión doutro título español de doutor/a obtido conforme a anteriores ordenacións universitarias

3. Os doutorandos que iniciasen o seu programa de doutoramento conforme a anteriores ordenacións universitarias, poderán acceder ás ensanzas de doutoramento, logo da súa admisión de acordo co establecido neste regulamento. En todo caso deberán reunir os requisitos establecidos con carácter xeral neste regulamento para acceso a estudos de doutoramento.

4. Poderán acceder aos estudos de doutoramento as persoas licenciadas, arquitectos/as ou enxeñeiros/as que estean en posesión do diploma de estudos avanzados obtido de acordo co disposto no Real decreto 778/1998, do 30 de abril, ou alcanzasen a suficiencia investigadora regulada no Real decreto 185/1985, do 23 de xaneiro.

5. Poderán acceder aos estudos de doutoramento as persoas licenciadas, arquitectos/as ou enxeñeiros/as que estean en posesión dun título de mestrado oficial conforme ao Real decreto 56/2005 ou do Real decreto 1393/2007, modificado polo Real decreto 861/2010 ou superasen 60 ECTS de estudos de mestrado oficial.

6. Tamén poderán acceder as persoas diplomadas, enxeñeiros/as técnicos/as ou arquitectos/as técnicos/as que acrediten ter superados 300 créditos ECTS no conxunto de estudos universitarios oficiais, dos que, polo menos 60, terán que ser de nivel de mestrado.

#### **Artigo 16. Admisión**

Na memoria de verificación e na oferta dos programas poderán establecerse requisitos e criterios adicionais para a selección e admisión dos estudantes

No caso de que o alumnado careza da formación previa completa esixida no programa, a admisión poderá quedar condicionada á superación de complementos de formación específicos.

De ser o caso, os programas, a través da súa memoria, determinarán os complementos de formación que deberán ser concretados para cada alumno pola CAPD, sen que poidan superarse os 15 ECTS. A realización destes complementos será previa ou simultánea á matrícula en tutela académica no programa. No caso de realización simultánea o alumnado deberá matricularse destes complementos no momento de formalizar a matrícula de tutela académica no programa; no caso de ser previa só se matriculará destes complementos e non se asinará o compromiso de supervisión a que fai referencia o artigo 31 deste regulamento nin se abrirá o documento de actividades do doutorando ata a súa superación.

Os complementos de formación deberán superarse no prazo máximo de tres cuatrimestres consecutivos. De non facelo así, o alumnado causará baixa no programa.

Os devanditos complementos de formación específica poderán ser de materias ou módulos de mestrado e grao e terán, para efectos de prezos públicos e de concesión de bolsas e axudas ao estudo, a consideración de formación de nivel de doutoramento. No caso de realizarse con carácter previo o seu desenvolvemento non computará para efectos do límite temporal establecido para a realización da tese. Estes créditos tampouco computarán para os efectos dos requisitos ordinarios de acceso ao programa de doutoramento.

#### **Artigo 17. Alumnado con titulacións estranxeiras**

O estudiantado que teña títulos equivalentes aos oficiais de grao e mestrado que dean acceso aos estudos de doutoramento no seu país de orixe, expedidos por unha universidade ou centro de ensino superior estranxeiros, poderán acceder aos estudos de doutoramento logo da homologación do seu título polo ministerio competente ou pola universidade, segundo corresponda.

O estudiantado con título estranxeiro sen homologar poderá solicitar a admisión nos estudos de doutoramento sempre que se acredite un nivel de formación equivalente ao do título oficial español de mestrado universitario e faculte no país expedidor do título para o acceso a estudos de doutoramento. Esta admisión non implicará, en ningún caso, a homologación do título previo nin o recoñecemento para outros efectos que os de acceso a estas ensinanzas.

Deste xeito o estudiantado con título estranxeiro sen homologar requirirá, para a plena validez da súa matrícula, unha resolución de equivalencia outorgada polo/a reitor/a, logo dos informes que regulamentariamente se establezan, en que se indicará a denominación do título estranxeiro e o seu recoñecemento para os efectos de cursar estes estudos. A equivalencia

deberá solicitarse dentro do prazo que se estableza para tal efecto e acompañarase do título con base no cal se desexa acceder aos estudos de terceiro ciclo e un certificado académico dos mencionados estudos en que consten as materias e os períodos académicos cursados, ben como que o título dá acceso no seu país aos estudos de doutoramento. Todo o anterior presentárase debidamente legalizado (orixinais e fotocopias para o seu cotexo ou fotocopias autenticadas polos servizos consulares ou embaixadas españolas). No caso de non ser o idioma de orixe o castelán, deberase acompañar tamén unha tradución legalizada da documentación anteriormente citada.

Na solicitude de admisión do alumnado tamén se incluírá a posibilidade de realizar simultaneamente a solicitude de equivalencia, en caso necesario. A CAPD valorará a adecuación académica dos estudos cursados pola persoa solicitante, circunstancia que figurará na proposta de persoas admitidas no programa.

As resolucións de equivalencia constarán no expediente do/a alumno/a e poderán certificarse como calquera outro extremo seu.

O sistema informático poderá considerar a xestión de informes emitidos como precedentes para casos similares. Nestes casos non será necesario a realización de novos informes.

O alumnado poderá matricularse sen agardar a resolución de equivalencia, mais a súa matrícula ficará condicionada a esta declaración.

Cada programa poderá establecer unha cota para alumnado estranxeiro, do mesmo modo que poderá establecer e acordar preadmisións condicionadas ao cumprimento dos requisitos que cómpre realizar con anterioridade aos prazos de preinscrición.

#### **Artigo 18. Alumnado con necesidades especiais**

Para aquel estudiantado con necesidades educativas especiais, estableceranse sistemas e servizos de apoio e asesoramento axeitados, que poderán determinar a necesidade de posibles adaptacións curriculares, itinerarios ou estudos alternativos.

#### **Artigo 19. Procedemento de admisión**

1. O estudiantado que reúna os requisitos de acceso e admisión poderá solicitar a admisión a un programa de doutoramento, para o cal se establecerá un prazo de preinscrición. A mencionada solicitude presentárase no lugar que sinala a convocatoria.

2. Unha que vez remate este prazo, a CAPD realizará a proposta de alumnos admitidos, coa súa correspondente lista da agarda, de acordo cos criterios de selección establecidos no programa. A dita proposta considerárase como relación provisoria de persoas admitidas e deberá facerse pública.

3. As persoas aspirantes non admitidas poderán presentar unha reclamación no prazo e forma establecidos na correspondente convocatoria de matrícula. Ao transcorrer o prazo de reclamacións e unha vez que estas se resolvan, remitirase a relación de persoas admitidas ao órgano de xestión de alumnos correspondente, para efectos de poder formalizaren a súa matrícula no prazo que se sinala. De non a formalizar, a persoa solicitante decaerá nos seus dereitos.

## **Artigo 20. Adaptacións e recoñecementos**

O alumnado que á entrada en vigor do Real decreto 99/2011 estiver cursando estudos de doutoramento poderá solicitar a admisión nun programa verificado conforme ao citado real decreto, pola vía de adaptación. Para a admisión por esta vía deberá ter un informe favorable da CAPD. Unha vez admitido, deberá realizar todos os trámites dos novos alumnos do programa e a liquidación de prezos públicos que proceda, e comezarán a computar os prazos para a etapa da tese.

Os cursos, seminarios, estadías e traballos de investigación realizados na etapa de tese e que non formaran parte formativa de programas do Real decreto 778/1998, do Real decreto 56/2005 ou do Real decreto 1393/2007, ou a realización daqueles outros realizados en programas de doutoramento dunha universidade española ou estranxeira, poderán ser recoñecidos polos equivalentes dun programa de doutoramento. Para seren recoñecidos, deberá existir afinidade suficiente en duración e contidos coas actividades formativas do programa. Unha vez recoñecidos incluíranse no documento de actividades personalizado e se poderá imputar como superación dunha actividade formativa do programa, de ser o caso.

A universidade fixará por resolución reitoral as bases e o procedemento de adaptación e recoñecemento en desenvolvemento deste regulamento.

## **Capítulo 6. Matrícula**

### **Artigo 21. Matrícula no programa de doutoramento**

Os doutorandos admitidos nun programa de doutoramento deberán matricularse, de ser o caso, das actividades formativas determinados pola CAPD e anualmente polo concepto de tutela académica do doutoramento, tras a avaliación positiva da CAPD, na unidade de xestión e de acordo co procedemento e calendario que a universidade estableza para tal efecto. No caso de que un doutorando non realice a matrícula anual nun curso académico, causará baixa definitiva no programa, salvo nos casos previstos por baixa temporal no programa. A matrícula de tutela académica outorga ao doutorando o dereito á titoría académica, á utilización dos recursos necesarios para o desenvolvemento do seu traballo e á plenitude de dereitos previstos pola normativa para o estudiantado de doutoramento.

Correspóndelle á comunidade autónoma fixar as taxas académicas polos estudos conducentes á obtención de títulos oficiais no ensino universitario, que terán a consideración de prezos públicos.

Cando se trate de programas conxuntos, o convenio incluído na memoria de verificación do programa determinará a forma en que debe levarse a cabo a dita matrícula.

Cando se trate de programas de intercambio de alumnado, o acordo asinado polas universidades participantes determinará a forma en que debe levarse a cabo a matrícula.

### **Artigo 22. Períodos de matrícula**

Haberá dous períodos de matrícula ordinarios para doutorandos de novo ingreso: un ao comezo do primeiro cuadrimestre e outro a comezo do segundo cuadrimestre do mesmo curso académico. A CAPD poderá solicitar á universidade cada curso académico que non se habilite o segundo período de matrícula para alumnado de novo ingreso.

Os prazos para o pagamento dos prezos públicos serán os fixados na resolución reitoral da correspondente universidade.

As tres universidades do SUG tratarán de establecer un calendario de matriculación común.

### **Artigo 23. Matrícula a tempo completo e a tempo parcial**

O doutorando poderá matricularse a tempo completo ou a tempo parcial. Para esta última modalidade, será requisito indispensable a condición de doutorando a tempo parcial outorgada, de ser o caso, pola CAPD. Esta condición deberá solicitarse cada curso académico á CAPD para o cal se achegarán os documentos xustificativos. Para a condición de doutorando a tempo parcial, teranse en conta motivos de carácter laboral, familiar ou persoal.

Os motivos de carácter laboral, preferentemente situacións de carácter fixo ou estable, mais non situacións eventuais, como contratos temporais, contratos en prácticas ou bolsas de colaboración cunha duración inferior a seis meses.

Os motivos de carácter familiar ou persoal incluírán, entre outras, situacións de dependencia, coidado de persoas maiores ou fillos discapacitados, familia numerosa con fillos en idade escolar e situacións de violencia de xénero.

O estudantado cun grao de discapacidade superior ao 33% obterá, se así o solicita e xustifica documentalmentemente á CAPD, a condición de estudante a tempo parcial.

O cambio de modalidade de matrícula poderá solicitarse nos períodos de matrícula ordinarios, condicionado ao informe favorable da CAPD.

A universidade, a proposta de cada CAPD, poderá establecer do total de estudantes matriculados no programa, unha porcentaxe máxima de doutorandos matriculados a tempo parcial.

### **Artigo 24. Simultaneidade da matrícula nun programa de doutoramento e noutros estudos universitarios**

Para a simultaneidade da matrícula nun programa de doutoramento coa matrícula noutros estudos universitarios oficiais (grao e/ou mestrado), terase en conta:

Que a matrícula nun programa de doutoramento a tempo completo computa, para efectos de valoración da simultaneidade de estudos nun curso académico, como 60 ECTS.

Que a suma dos créditos ECTS da matrícula a tempo completo no programa de doutoramento e a matrícula noutros estudos universitarios oficiais (grao e/ou mestrado) nun mesmo curso académico non pode exceder de 75 ECTS.



Que un doutorando matriculado a tempo parcial nun programa de doutoramento non poderá realizar simultaneamente outros estudos universitarios.

## **Capítulo 7. Duración dos estudos de doutoramento**

### **Artigo 25. Duración máxima e mínima dos estudos de doutoramento a tempo completo e a tempo parcial**

A duración dos estudos de doutoramento a tempo completo e a tempo parcial será, respectivamente, dun máximo de tres e cinco anos. En cada caso, esta duración contarase desde a primeira matrícula do doutorando polo concepto de tutela académica do doutoramento ata a presentación da solicitude do depósito da tese de doutoramento.

A duración mínima dos estudos de doutoramento será, a tempo completo e a tempo parcial, de 18 meses, contados desde a admisión do doutorando ata a presentación da solicitude do depósito da tese de doutoramento.

No caso de estudantes procedentes de estudos de doutoramento regulados por normativas anteriores ou traslados de expedientes doutras universidades, computará para os efectos do establecido no parágrafo anterior o período en tutela académica previo á matrícula no programa de doutoramento na Universidade da Coruña.

Cando nun mesmo programa de doutoramento, o doutorando utilizase ambas as modalidades de matrícula, computarase para todos os efectos a duración dos estudos de doutoramento en termos de estudos a tempo completo coa consideración de que un ano de matrícula a tempo parcial equivale a 0,6 anos de matrícula a tempo completo.

### **Artigo 26. Prórrogas para a realización dos estudos de doutoramento a tempo completo e a tempo parcial**

Se a solicitude do depósito da tese de doutoramento non se presenta transcorrido o prazo establecido, a CAPD podería autorizar a prórroga do prazo, logo da solicitude do doutorando. A prórroga sería dun ano nos estudos de doutoramento a tempo completo e de dous anos nos estudos de doutoramento a tempo parcial. De forma excepcional, podería ampliarse este prazo en ambos os casos en outro ano adicional. A autorización das citadas prórrogas farase de forma motivada e de acordo coa normativa da universidade.

### **Artigo 27. Baixa temporal nun programa de doutoramento**

O doutorando poderá solicitar á CAPD a baixa temporal no programa por enfermidade, embarazo ou por calquera outra causa prevista pola normativa vixente por un período máximo dun ano, ampliable ata un ano máis. A CAPD pronunciarase sobre se procede acceder ao solicitado polo doutorando, de acordo coa normativa da universidade. As actividades desenvoltas polo doutorando durante a baixa temporal non poderán incluírse no documento de actividades e os períodos de baixa temporal no programa non computarán no prazo de desenvolvemento da tese a que fai referencia o artigo 25 deste regulamento.

## **Capítulo 8. Organización da formación e expediente do alumnado**

### **Artigo 28. Competencias e destrezas para adquirir polo estudantado**

Os estudos de doutoramento garantirán, como mínimo, a adquisición polo doutorando das competencias básicas, destrezas e habilidades recollidas no artigo 5 do RD 99/2011, así como aquelas outras que figuren no Marco Español da Cualificación para a Educación Superior.

### **Artigo 29. Documento de actividades do doutorando**

Unha vez matriculado no programa, materializarase para cada doutorando o documento de actividades personalizado para efectos do rexistro individualizado. Nel inscribíranse todas as actividades de interese para o desenvolvemento do doutorando segundo o que estableza o órgano responsable dos estudos de doutoramento na universidade e será avaliado anualmente pola CAPD.

Este documento deberá axustarse ao formato establecido, rexistrarse na aplicación informática e deberá quedar constancia documental que acredite a realización das actividades realizadas polo doutorando.

O doutorando terá acceso ao documento de actividades de doutorando para anotar e actualizar as actividades que realice no contexto do programa. Os seus rexistros serán validados polo órgano académico correspondente após a valoración do/a titor/a e o/a director/a, logo de que a administración comprobe a autenticidade/veracidade dos méritos alegados, de ser o caso.

Ao documento de actividades de doutoramento terán acceso, para as funcións que correspondan en cada caso, o doutorando, o seu titor ou titora, o seu director ou directora de tese, a CAPD, o órgano responsable dos estudos de doutoramento na universidade e o persoal de administración responsable.

### **Artigo 30. Plan de investigación**

Antes de seis meses, que comezarán a contar desde a data da matrícula, o doutorando elaborará un plan de investigación que incluírá a metodoloxía que empregará e os obxectivos que se han de alcanzar, así como os medios e a planificación temporal para acadalo. O plan deberá ser presentado e avalado co informe do director/es e do/a titor/a e deberá ser aprobado pola CAPD. Este plan poderase mellorar e detallar no proceso de avaliación anual contando co aval do/a titor/a e o/a director/a.

Anualmente a CAPD avaliará o plan de investigación e o documento de actividades, e disporá para realizar a avaliación dos informes que para tal efecto deberán emitir o/a titor/a e o/a director/a. A avaliación positiva será requisito indispensable para continuar no programa. No caso de avaliación negativa, que será debidamente motivada, o doutorando deberá ser de novo avaliado no prazo de seis meses, para o cal elaborará un novo plan de investigación. No suposto de producirse unha nova avaliación negativa, causará baixa definitiva no programa.

### **Artigo 31. Compromiso de supervisión**

As funcións de supervisión, tutela e seguimento dos doutorandos reflectiranse nun **compromiso de supervisión**. O devandito compromiso será asinado por unha representación específica designada pola universidade, o/a titor/a e o doutorando, nun prazo máximo dun mes que comezará a contar desde a data de matrícula, mentres que a sinatura do/a director/a se incorporará no momento da súa designación. Este compromiso de supervisión engadirase ao documento de actividades do doutorando no momento da súa sinatura por todas as persoas implicadas.

No compromiso de supervisión especificarase a relación académica entre o doutorando e a Universidade, os seus dereitos e deberes, incluídos os posibles dereitos de propiedade intelectual e/ou industrial derivados da investigación, así como a aceptación do procedemento de resolución de conflitos e a súa duración. Inclúiranse tamén os deberes do/a titor/a do doutorando e do seu director ou directora de tese.

No compromiso de supervisión deberán figurar as condicións en que se publicará a tese de doutoramento.

### **Artigo 32. Resolución de conflitos**

As dúbidas ou controversias que xurdiren en relación cos axentes implicados no desenvolvemento do programa de doutoramento serán levadas polas persoas interesadas en primeiro termo ante a CAPD.

No caso de que as controversias conclúan nun conflito, a súa resolución corresponderá ao órgano responsable dos estudos de doutoramento na universidade. O acordo será comunicado por resolución do/a director/a ou presidente/a do órgano ás partes afectadas. As persoas lexitimadas poderán presentar recurso de alzada contra esta resolución perante o reitor da Universidade ou persoa en quen delegar.

## **Capítulo 9. Tese de doutoramento**

### **Artigo 33. A tese de doutoramento**

A tese de doutoramento consistirá nun traballo orixinal de investigación relacionado cos campos científico, técnico ou artístico do programa de doutoramento cursado polo doutorando.

A tese de doutoramento redactarase, como norma xeral, en lingua galega, castelá, inglesa ou portuguesa ou no idioma de uso común no ámbito científico, técnico ou artístico do que se trate. Porén, o órgano responsable dos estudos de doutoramento na universidade poderá autorizar a súa redacción noutro idioma, logo de que a CAPD informe favorablemente e garanta que o tribunal estea en condicións de xulgala. No caso de que se redacte nunha lingua distinta do galego ou do castelán, a tese deberá incluír un anexo, incluído no propio volume da tese, que conterá un resumo de, polo menos, tres mil palabras en galego ou en castelán.

A tese de doutoramento deberá incluír polo menos: un resumo, unha introdución, os obxectivos, a metodoloxía, os resultados, as conclusións e a bibliografía, así como os informes

de valoración da tese por parte do/a director/a e titor/a. A universidade valorará a posibilidade de publicar unha guía de boas prácticas para a dirección de teses de doutoramento e mais unha guía de estilo para a presentación da tese de doutoramento.

#### **Artigo 34. Procedemento de autorización da tese para a súa defensa**

Unha vez que remate a elaboración da tese e logo do informe favorable do/a director/a ou directores e, no seu caso, do/a titor/a, o doutorando solicitaralle á CAPD a autorización para a súa defensa de acordo co procedemento establecido para o efecto en cada caso.

Unha vez autorizada a presentación da tese para a súa defensa por parte da CAPD, esta remitirá coa maior brevidade posible ao órgano responsable dos estudos de doutoramento na universidade a seguinte documentación:

Informe de autorización para a defensa da tese emitido pola CAPD.

Un exemplar da tese en soporte papel asinado polo doutorando, polo seu director/a ou directores e, de ser o caso, polo/a titor/a e un exemplar en formato electrónico (PDF)

Toda a documentación requirida no caso de que se solicite a mención internacional e/ou tese por compendio de publicacións segundo o establecido no presente regulamento.

Documento de actividades do doutorando actualizado e o plan de investigación acompañado dos informe favorables do/a titor/a e do/a director/a.

Unha proposta da composición do tribunal que xulgará a tese aprobada pola CAPD, formado por doutores especialistas na materia da tese de doutoramento, con experiencia investigadora acreditada e segundo o establecido no artigo 36 do presente regulamento.

Unha vez recibida toda a documentación da tese e revisado pola unidade competente que o expediente está completo e correcto, abrírase un período de exposición pública de 10 días hábiles en período lectivo, coa garantía da máxima difusión institucional para que calquera doutor/a poida examinar a tese e dirixirle por escrito as consideracións que estimar oportunas ao órgano responsable dos estudos de doutoramento na universidade. Co fin de facilitar a consulta das teses, a Universidade valorará a posibilidade de habilitar un procedemento telemático, sempre que non concorran limitacións derivadas do art. 14.6 do RD 99/2011.

Ao rematar o período de exposición pública, o órgano responsable dos estudos de doutoramento na universidade valorará a tese tendo en conta o informe da CAPD e as alegacións recibidas, de ser o caso. Asemade, o órgano responsable dos estudos de doutoramento na universidade poderá convocar o doutorando e/ou director/a ou solicitarlle resposta razoada das alegacións ou outra información que considerar necesaria, poderá consultar á CAPD e/ou contar coa colaboración doutros doutores externos para o asesoramento na avaliación da tese.

Tras a valoración da tese o órgano responsable dos estudos de doutoramento na universidade decidirá aprobar ou denegar a continuidade dos trámites, e rexistrará rexistro desta decisión no documento de actividades do doutorando. Esta decisión seralle comunicada ao/á director/a ou directores da tese de doutoramento, ao doutorando e mais á CAPD.

No caso de denegación da continuidade dos trámites, que deberá estar debidamente motivada, o órgano responsable dos estudos de doutoramento na universidade comunicará ao doutorando as vías que poidan conducir a corrixir axeitadamente a súa tese de doutoramento, antes de proceder a unha nova solicitude de depósito.

No caso de aprobación de continuidade procederase á aprobación do tribunal nos termos establecidos no artigo 36 do presente regulamento.

Unha vez que se nomeen o tribunal e os suplentes, comunicárase o nomeamento á CAPD e ao/á director/a, e farase chegar a cada un deles a notificación da súa designación, un exemplar da tese de doutoramento, e o expediente do doutorando. A partir deste momento disporán de 20 días naturais para enviarlle ao órgano responsable dos estudos de doutoramento na universidade un informe individual e razoado en que se valore a tese e figure explicitamente o ditame sobre se procede ou non a autorización para a súa defensa.

Unha vez recibidos os informes, o órgano responsable dos estudos de doutoramento na universidade disporá se procede ou non a defensa pública ou, de ser o caso, a interrupción da súa tramitación, o que se comunicará por escrito ao doutorando, aos directores da tese e á CAPD.

De ser denegada a autorización da defensa da tese de doutoramento polo órgano responsable dos estudos de doutoramento na universidade, o doutorando poderá solicitar a certificación literal dos ditames a que se refire o parágrafo anterior. No caso de ser autorizada a defensa o doutorando poderá solicitar a certificación literal dos informes despois da súa defensa.

A defensa pública deberá realizarse nun prazo máximo de tres meses desde a posta a disposición do tribunal da documentación especificada anteriormente neste mesmo artigo, exemplar de tese e expediente do doutorando, salvo causas debidamente xustificadas. Se se supera este prazo deberán iniciarse de novo os trámites de autorización da tese para súa defensa.

Ao longo do proceso de autorización da defensa da tese o doutorando estará obrigado a introducir os datos da súa tese na base TESEO segundo o procedemento e prazos que estableza a Universidade.

### **Artigo 35. Teses con protección de dereitos**

No compromiso documental incluíranse as cláusulas oportunas para garantir a non difusión dos contidos no caso de teses de doutoramento en que existan cláusulas de confidencialidade con empresas ou aquelas que poidan dar lugar a dereitos de propiedade industrial e intelectual e dos que non se poida realizar a difusión de contidos antes de estar debidamente protexidos.

Este tipo de tese formalizarase en dúas versións: a reducida, en que se eliminarán os contidos afectados polo deber de non difusión ou polo deber de segredo ou confidencialidade, e o exemplar completo, que ficará arquivado na universidade baixo compromiso de confidencialidade.

O exemplar reducido será o que se deposite para a súa consulta pola comunidade científica de doutores. Esta versión deberá coincidir co contido da exposición e defensa pública da tese.

A versión completa será a que se lles entregue aos membros do tribunal para a súa avaliación. Os membros deberán asinar o correspondente compromiso de confidencialidade sobre os contidos dos que non se pode facer unha difusión pública.

Se o tribunal desexa formular cuestións ao doutorando sobre os contidos protexidos, estas intervencións faranse en sesión privada, con carácter previo ou posterior á pública.

Unha vez aprobada a tese, o exemplar reducido será o que se publique no repositorio institucional. Unha vez que se realicen as oportunas proteccións ou venza o prazo de confidencialidade, o doutorando poderá solicitar, logo de acreditar estas circunstancias, a súa substitución polo exemplar completo.

**Artigo 36. Tribunal de avaliación** (modificado polo Consello de Goberno do 23 de abril de 2013)

A CAPD, oído o/a director/a da tese (e/ou de ser o caso, o/a titor/a) propondrá unha relación de dez membros do tribunal que avaliará a tese.

Unha vez admitida a trámite a tese de doutoramento pola CAPD, o órgano responsable dos estudos de doutoramento na universidade avaliará a proposta de tribunal remitida pola CAPD. Esta proposta irá acompañada dun informe individualizado e razoado sobre a idoneidade de cada un dos membros propostos para xulgar a tese mediante a mención da especialidade ou especialidades da súa investigación, as publicacións, os proxectos de investigación e outras actividades ou méritos que consideren oportunos, así como a aceptación expresa dos membros propostos.

O tribunal encargado de xulgar a tese será designado polo órgano responsable dos estudos de doutoramento na universidade entre os dez especialistas propostos pola CAPD e estará constituído por cinco titulares e dous suplentes. Entre os membros do tribunal nomearase un presidente e un secretario do tribunal que se designará, preferentemente, entre os membros do tribunal da universidade. De non ser así, deberá presentarse un informe xustificativo e, de ser o caso, sinalar outro/a profesor/a da universidade como responsable da recepción das actas e da súa posterior entrega na unidade administrativa correspondente.

En caso de renuncia por causa xustificada dun integrante titular do tribunal procederase a substituílo polo suplente correspondente seguindo a orde da proposta de suplentes do tribunal.

Na composición do tribunal deben respectarse os seguintes requisitos:

Todos os membros deberán ser doutores e con experiencia investigadora acreditada. Entenderase por experiencia acreditada o cumprimento dalgún dos requisitos establecidos para ser director/a de tese no presente regulamento. O profesorado dos corpos docentes universitarios poderá formar parte dos tribunais de teses de doutoramento aínda que estean en situación de excedencia, xubilación, servizos especiais ou en comisión de servizos, coa consideración, neste derradeiro caso, como pertencente á universidade en que se atope prestando os seus servizos. O profesorado contratado laboral poderá formar parte dos tribunais de teses de doutoramento aínda que estea en situacións equivalentes ás do persoal dos corpos docentes universitarios..

O tribunal estará formado por unha maioría de membros externos á Universidade da Coruña, ás institucións colaboradoras no programa ou na Escola de Doutoramento e ao profesorado do

programa de doutoramento. En ningún caso poderán formar parte do tribunal mais de dous membros pertencentes á mesma institución.

No caso de teses presentadas por compendio de publicacións non poderán formar parte do tribunal os coautores das publicacións.

En ningún caso poderán formar parte do tribunal o/a director/a ou codirectores da tese nin, de ser o caso, o/a titor/a, salvo nos casos de teses presentadas no marco de acordos bilaterais de cotutela con universidades estranxeiras que así o teñan previsto, ou nos casos de teses presentadas en programas de doutoramento conxuntos con universidades estranxeiras, en virtude dos correspondentes convenios.

No caso da mención internacional no título de doutor/a cando menos un experto co título de doutor/a dunha institución de ensinanza superior ou centro de investigación de prestixio non españois, e distinto do responsable da estadía sinalada no artigo 40, ten que formar parte do tribunal titular. Para tal efecto nomearase un doutor estranxeiro na comisión titular e outro que cumpra as mesmas condicións como suplente.

A composición do tribunal tenderá a unha presenza equilibrada de homes e mulleres.

Non poderán formar parte da proposta dun tribunal quen incorra en calquera das causas de abstención establecidos no artigo 28 da Lei 30/1992 de 26 de novembro.

### **Artigo 37. Acto de defensa pública da tese (modificado polo Consello de Goberno do 23 de abril de 2013)**

Unha vez autorizada a defensa pública da tese, o/a doutorando/a deberá efectuar o pagamento das taxas dos dereitos de exame do grao de doutor/a na unidade administrativa responsable dos estudos de doutoramento.

Una vez realizado tal pagamento de taxas, o órgano responsable dos estudos de doutoramento na universidade remitirá ao/á secretario/a do tribunal os documentos que deberán ser cubertos no acto de defensa da tese de doutoramento:

Acta de constitución do tribunal.

Acta da sesión.

Sobres oficiais para recoller os informes confidenciais sobre a tese para os efectos da mención de “cum laude” e premio extraordinario.

O/A presidente/a do tribunal convocará o acto de defensa da tese de doutoramento, e o/a secretario/a comunicará, polo menos con 10 días de antelación, o día, o lugar e mais a hora do citado acto ao órgano responsable dos estudos de doutoramento na universidade, que á súa vez informará á CAPD, ao doutorando, ao/á director/a da tese, e fará a publicidade pertinente.

A defensa da tese deberá realizarse en sesión pública durante o período lectivo do calendario académico e terá lugar na propia universidade española en que o doutorando estivese matriculado ou, no caso de programas de doutoramento conxuntos, nos termos que indiquen os convenios de colaboración. Calquera outra opción requirirá da autorización expresa do órgano responsable dos estudos de doutoramento na universidade, e deberase asegurar, en



todo momento, o cumprimento da presente normativa e dos procesos establecidos para a súa avaliación.

En casos debidamente xustificadas por circunstancias excepcionais que imposibiliten a presenza física dun membro do tribunal, o órgano responsable dos estudos de doutoramento na universidade poderá autorizar a súa participación por videoconferencia, a condición de que os outros catro membros do tribunal estean presentes no acto. En ningún caso, este membro ausente poderá ser o/a presidente/a ou o/a secretario/a do tribunal.

Se no acto de defensa e exposición pública da tese non se presentase algún membro do tribunal titular, incorporárase as ou os suplentes. Se isto non for posible, a presidencia do tribunal decidirá se continuar ou non co acto de defensa, unha vez consultados o resto de integrantes. Para que se poida proceder á defensa da tese, será necesario que estean presentes un mínimo de catro membros do tribunal. De non poder constituírse o tribunal, o/a presidente/a comunicará este feito ao órgano responsable dos estudos de doutoramento na universidade, que poderá autorizar a defensa nas 24 horas seguintes. De non ser factible, o/a presidente/a procederá a convocar de novo o acto de defensa da tese de doutoramento nos termos fixados no presente artigo.

Os membros do tribunal deberán expresar a súa opinión sobre a tese e poderán formular cantas cuestións e obxeccións consideraren oportunas, ás que o/a doutorando/a deberá contestar. Así mesmo, os doutores presentes no acto poderán formular cuestións e obxeccións, e o/a doutorando/a responder, todo isto no momento e forma que sinala o/a presidente/a do tribunal.

### **Artigo 38. Cualificación da tese de doutoramento**

Unha vez finalizada a defensa da tese por parte do doutorando, o tribunal emitirá un informe sobre esta e a cualificación global en termos de *apto* ou *non apto*. O/A secretario/a do tribunal redactará acta de colación do título de doutor/a, que incluírá información relativa ao desenvolvemento do acto de defensa e a cualificación. Se o doutorando solicitou optar á mención internacional do título de doutor/a, o/a secretario/a do tribunal incluírá na acta de colación a certificación de cumprimento dos requisitos esixidos. O/A presidente/a do tribunal comunicará, en sesión pública, a cualificación.

O tribunal poderá propor que a tese obteña a mención de «cum laude» se se emite en tal sentido o voto secreto positivo por unanimidade. O órgano responsable dos estudos de doutoramento na universidade regulamentará o procedemento para a materialización da concesión final da devandita mención en sesión diferente da correspondente á de defensa da tese de doutoramento.

O/A secretario/a do tribunal, ou profesor/a en quen delegar, será responsable da documentación correspondente á defensa da tese de doutoramento, que deberá remitir debidamente cuberta á unidade administrativa responsable dos estudos de doutoramento na Universidade da Coruña no prazo máximo de cinco días hábiles posteriores ao día de exposición e defensa da tese para o seu arquivo e documentación.

### **Artigo 39. Arquivo da tese de doutoramento**

Unha vez aprobada a tese de doutoramento, a Universidade, a través do servizo competente, ocuparase do seu arquivo en formato electrónico aberto nun repositorio institucional e remitirá, en formato electrónico, un exemplar seu, así como toda a información complementaria que for necesaria, ao Ministerio competente na materia para os efectos oportunos.

En circunstancias excepcionais determinadas pola CAPD, como poden ser, entre outras, a participación de empresas no programa, a existencia de convenios de confidencialidade con empresas ou a posibilidade de xeración de patentes que recaian sobre o contido da tese, o órgano responsable dos estudos de doutoramento na universidade habilitará procedementos que garantan a non publicidade destes aspectos.

### **Artigo 40. Mención internacional do título de doutor/a**

O título de doutor/a poderá incluír no seu anverso a mención «Doutor/a internacional», sempre que concorran as seguintes circunstancias:

Que durante a etapa de realización da tese, o/a doutorando/a realizase unha estadía mínima de tres meses fóra de España nunha institución de ensino superior ou centro de investigación de prestixio, cursando estudos ou realizando traballos de investigación. A estadía e as actividades teñen que ser avaladas polo/a director/a e autorizadas pola CAPD, e incorporaranse ao documento de actividades do doutorando.

Que parte da tese, polo menos o resumo e as conclusións, se redacte e sexa presentada nunha das linguas habituais para a comunicación científica no seu campo de coñecemento, distinta a calquera das linguas oficiais en España. Esta norma non será de aplicación cando as estadías, os informes e os expertos procedan dun país de fala hispana.

Que a tese fose informada por un mínimo de dous expertos doutores pertencentes a algunha institución de educación superior ou instituto de investigación non española.

Que polo menos un experto pertencente a algunha institución de educación superior ou centro de investigación non español, co título de doutor/a, e distinto da persoa responsable da estadía mencionada no apartado a), forme parte do tribunal avaliador da tese e distinto dos dous expertos referidos no apartado c).

Que a defensa da tese sexa efectuada na propia universidade española en que o doutorando estivese inscrito, ou, no caso de programas de doutoramento conxuntos, en calquera das universidades participantes ou nos termos que indiquen os convenios de colaboración.

A CAPD deberá remitir ao órgano responsable dos estudos de doutoramento na universidade a documentación acreditativa da estadía, a súa autorización para realizala e os informes dos dous expertos externos, xunto co resto de documentación, para que poida proceder á autorización da defensa da tese de doutoramento

### **Artigo 41. Tese por compendio de artigos de investigación**

A tese de doutoramento poderá consistir no conxunto de traballos que o/a doutorando/a ten publicados, ou conta coa aceptación definitiva para a súa publicación, durante a etapa de realización da tese de doutoramento. O conxunto destes traballos deberá abordar o proxecto de tese incluído no seu plan de investigación. Ademais, para ser incluída nesta modalidade de presentación da tese, como regra xeral cada publicación debe facer constar a adscrición do/a doutorando/a á universidade en que está a realizar o programa de doutoramento.

No momento do depósito da tese no órgano responsable dos estudos de doutoramento na universidade, o/a doutorando/a presentará a seguinte documentación adicional:

Informe do/s director/es da tese coa aprobación da CAPD onde se especifique a idoneidade da presentación da tese baixo esta modalidade; a contribución do doutorando, no caso de que haxa mais coautores; e os indicios de calidade das publicacións presentadas.

Aceptación por escrito dos coautores de que o/a doutorando/a presente o traballo como parte da tese.

Renuncia por escrito dos coautores non doutores á presentación dos traballos como parte doutra tese de doutoramento.

O órgano responsable dos estudos de doutoramento na universidade poderá establecer criterios específicos de calidade que deberán cumprir as publicacións que conforman a tese de doutoramento. En todo caso, os mencionados criterios deberán requirir cando menos o que segue:

Que a tese inclúa un mínimo de tres artigos de investigación, publicados ou con aceptación definitiva para a súa publicación. Os artigos, deben estar publicados en revistas indexadas na listaxe do ámbito correspondente do *Journal Citation Reports* (SCI e/ou SSCI). Naquelas áreas en que non sexa aplicable este criterio, substituirase polas bases relacionadas pola Comisión Nacional Avaliadora da Actividade Investigadora (CNEAI) para estas áreas.

Que os traballos sexan contribucións aceptadas en publicacións de ámbito e prestixio internacional con revisión anónima por pares.

Ademais dos requisitos xerais indicados no parágrafo anterior, a tese debe incluír:

Unha introdución, que especificamente conterá unha xustificación razoada da unidade e coherencia temática e metodolóxica da tese; os obxectivos que cómpre alcanzar; unha discusión xeral que dote de coherencia e unidade os diferentes traballos; as conclusións; e a bibliografía común.

Unha copia íntegra das publicacións, xa sexan publicadas, xa sexan con aceptación definitiva para a súa publicación, onde conste necesariamente o nome e a filiación do/a autor/a. Deben ficar claramente explícitos os nomes e a filiación de todos os coautores, a súa orde, así como a referencia completa da publicación, a editorial e o ISSN ou ISBN. No caso dos artigos con aceptación definitiva para a súa publicación e que na presentación da tese aínda non estean publicados, engadirase o código de identificación do mesmo (o DOI nas publicacións dixitais).

Ningún dos artigos incluídos na tese poderá ser anterior á data de matriculación no programa de doutoramento.

## Capítulo 10. Teses en réxime de cotutela

### Artigo 42. Principios básicos do réxime de cotutela

Enténdese cotutela como a dirección conxunta do traballo de investigación conducente á obtención do título de doutor/a, por parte de investigadores da Universidade da Coruña e doutra universidade ou organismo de investigación (en adiante institucións)

Deberanse respectar as lexislacións vixentes para temas de doutoramento existentes en cada país. De ser o caso, terase en conta a normativa para a obtención da mención internacional no título de doutor/a.

Asinarase un convenio marco entre as dúas institucións interesadas que estableza as liñas xerais de cooperación. Para cada cotutela que se poña en marcha asinarase un convenio específico baseado no principio da reciprocidade que terá unha duración máxima de tres anos. En virtude do convenio específico cada institución recoñecerá para todos os efectos ao seu persoal investigador as tarefas de dirección da tese independentemente do lugar da defensa da tese e emisión do título de doutor/a.

As persoas candidatas á preparación do doutoramento en cotutela efectuarán o seu traballo baixo o control e a responsabilidade dun director ou directora de tese en cada unha das institucións interesadas.

O/a doutorando/a matricularase en cada unha das institucións, mais con dispensa de pagamento naquela onde non vaia ser lida a tese. No convenio específico indícarase a partida orzamentaria en que se cargará a taxa no caso de que a dispensa corresponda á Universidade da Coruña.

O tempo de preparación da tese non será superior a tres anos desde a sinatura do convenio específico e repartirase entre as dúas institucións por períodos de estadía alternativos en cada unha delas. O tempo de estadía mínimo nunha das dúas institucións non será inferior a seis meses, de modo que se completará o período restante na outra. A devandita estadía poderá realizarse dunha soa vez ou en varios períodos

A tese será obxecto dunha defensa única en unha das dúas institucións que será a encargada da emisión do título coa mención de cotutela coa outra institución implicada.

Unha vez que se admita a trámite a tese, o tribunal ante o que deba defenderse será proposto, de común acordo, polas dúas institucións, e a súa composición atenderá á lexislación sobre tribunais vixente no estado ao que pertence a institución en que se defende a tese. O financiamento dos gastos do profesorado estranxeiro que forme parte do tribunal será responsabilidade da institución en que este actúe. Na devandita proposta deberá figurar, cando menos, un representante de cada institución.

A lingua de escritura e defensa da tese respectará a normativa vixente na institución que emita o título salvo indicación noutro sentido reflectida no convenio específico.

O órgano responsable dos estudos de doutoramento na Universidade realizará o seguimento e control das teses realizadas en réxime de cotutela

#### **Artigo 43. Procedemento administrativo da cotutela**

Os/as reitores/as (ou representantes legais que correspondan) asinarán os convenios de colaboración: marco e específico a proposta da institución en que se vaia ler a tese de doutoramento. Os convenios deberán ser remitidos á vicerreitoría/unidade competente e aprobados polo órgano responsable dos estudos de doutoramento na Universidade.

Unha vez asinado o convenio de cotutela específico, o/a doutorando/a presentará a súa solicitude de admisión no programa de doutoramento da Universidade da Coruña seguindo as normas de matrícula ditas para tal efecto.

O/a doutorando/a formalizará matrícula en período de tese en cada curso académico mentres estea en vigor a cotutela.

Na portada da tese deberá figurar que a tese se realiza en cotutela entre as dúas institucións.

O tribunal designarase pola institución en que vaia lerse a tese de doutoramento. A institución que designe o tribunal enviaralle unha notificación da súa designación á outra institución e se nun prazo de 30 días non recibe alegación ningunha considerarase aprobado.

No caso de emisión do título na Universidade da Coruña:

A presentación, autorización e defensa da tese de doutoramento seguirá o regulado na Universidade da Coruña.

O/a doutorando/a debe engadir ao expediente de solicitude de admisión a trámite da lectura da súa tese de doutoramento unha certificación da/s estadía/s de investigación expedida pola outra institución, e validada polo órgano responsable dos estudos de doutoramento na Universidade da Coruña.

O servizo competente da Universidade da Coruña comprobará o cumprimento dos requisitos establecidos na normativa aplicable e someterá a tese a aprobación do órgano responsable dos estudos de doutoramento na Universidade

A proposta de tribunal será enviada polo servizo competente da UDC á outra institución. Unha vez recibida a conformidade da outra institución ou pasados 30 días sen contestación, procederase ao nomeamento do tribunal.

Lectura da tese: haberá unha acta específica onde se especifiquen os termos da cotutela (institucións participantes e data de sinatura do convenio específico) e a/o secretaria/o do tribunal certificará que no tribunal participa algún membro da outra institución.

Unha vez recibida, a acta de lectura de tese, darase a alta no programa informático coa indicación expresa da realización en réxime de cotutela coa outra institución e mais a data da sinatura do convenio específico.

Unha vez que a persoa interesada solicite o título de doutor/a procederase ao asento no libro de rexistro de títulos oficiais de doutor/a, coa constancia no recadro de observacións da súa realización en réxime de cotutela.

O servizo competente da UDC comunicarlle á outra institución a defensa da tese e a solicitude de emisión de título, nun prazo de 30 días a partir do asento do título no rexistro

En caso de emisión do título pola outra institución, nun prazo de 30 días a partir do rexistro do título na outra institución, a outra institución achegará á Universidade da Coruña unha certificación en que consten os seguintes datos:

Nome e DNI (ou número de pasaporte) do doutorando,

título da tese,

nome, DNI (ou número de pasaporte), e afiliación dos directores de tese,

data de lectura,

cualificación,

composición do tribunal,

denominación do título

O servizo competente da UDC procederá ao asento no libro de rexistro de teses de doutoramento en cotutela lidas noutras institucións

## Capítulo 11. Premio extraordinario

### Artigo 44. Premio extraordinario de doutoramento

As teses de doutoramento defendidas na Universidade da Coruña que alcanzasen a cualificación de *Apto cum laude* poderán ser obxecto de mención especial de premio extraordinario de doutoramento na Universidade.

Para os efectos exclusivos da obtención do premio extraordinario de doutoramento cada un dos membros do tribunal que avalíe a tese emitirá unha serie de valoracións numéricas confidenciais nun formulario específico. A dita valoración ponderará o nivel das contribucións orixinais da tese e o seu grao de innovación dentro do campo de coñecemento que corresponda.

A Universidade establecerá anualmente o número de premios extraordinarios que concederá e os prazos e procedemento da convocatoria dos premios extraordinarios. Na devandita convocatoria incluírase a relación de criterios específicos que se aplicarán na selección das teses no relativo á concesión da mención do premio extraordinario.

O reitor, a proposta do órgano responsable dos estudos de doutoramento na Universidade nomeará anualmente o/os tribunal/ais encargado/s de elaborar a proposta de concesión de premios extraordinarios de doutoramento.

Para poder pertencer ao devandito tribunal teranse que cumprir os seguintes requisitos:

a) Ter cando menos un sexenio de investigación concedido.

b) Non ser un dos directores, codirectores ou titores das teses que optan ao premio extraordinario.

c) Non ser coautor/a de ningunha das patentes, artigos ou traballos dos doutorandos que concorren ao premio.

O tribunal estará constituído, como mínimo, por cinco membros titulares e cinco suplentes. Na súa composición garantirase a presenza equilibrada dos ámbitos implicados. O tribunal, unha vez constituído, e logo do exame da documentación achegada e das deliberacións oportunas, resolverá por maioría, a proposta das teses merecedoras de premio extraordinario, axustándose ao número máximo previsto.

Para a avaliación, o tribunal basearase nos criterios de avaliación fixados anualmente polo órgano responsable dos estudos de doutoramento na Universidade, criterios que deben facerse públicos na convocatoria do premio e en ningún caso poderá someterse ás persoas aspirantes ao mencionado premio á realización de exercicios ou probas adicionais. Sexa como for, estes criterios terán en conta, polo menos:

A cualificación da tese, obtida da valoración confidencial emitida por cada un dos membros do tribunal.

Os currículos do alumnado que opta ao premio, en particular:

As patentes concedidas e libros ou artigos publicados en revistas científicas orixinados polos traballos de investigación que culminaron na elaboración da tese.

As presentacións ou actas de congresos orixinados polos traballos de investigación que culminaron na elaboración da tese.

As actividades de investigación que foran consecuencia da tese (contratos realizados ao abeiro do artigo 83 da LOU, transferencia de tecnoloxía, axudas e subvencións...).

O tribunal enviará a proposta da concesión ao órgano ou unidade responsable dos estudos de doutoramento na Universidade para a súa valoración e esta remitirá a súa proposta á Secretaría Xeral para a súa aprobación polo Consello de Goberno. O servizo administrativo responsable dos estudos de doutoramento notificaralle ao alumnado que obtivera o premio unha notificación formal do acordo, que se anotará no seu expediente académico. Igualmente, nas certificacións académicas e no título de doutor/a farase constar a mención de premio extraordinario de doutoramento correspondente.

Os/as doutores/as aos/ás que se lles concedese o premio extraordinario de doutoramento terán exención de prezos públicos pola expedición do título de doutor/a.

A mención do premio extraordinario farase constar no título de doutor/a, de acordo coas normas que dite o ministerio competente. Sen prexuízo do anterior, a Universidade da Coruña poderá dispor o recoñecemento documental de mención de premio extraordinario de doutoramento na forma oportunamente determinada.

## **Capítulo 12. Expedición de títulos**



#### **Artigo 45. Títulos**

A superación dos estudos de doutoramento dará dereito á obtención do título de doutor ou doutora, coa denominación que figure no RUCT.

Con anterioridade á expedición do título entregaráselles ás persoas interesadas unha certificación supletoria del, conforme o modelo oficial. Este documento acreditará a finalización dos estudos e o dereito á expedición do título.

A denominación dos títulos de doutor/a será: doutor ou doutora pola Universidade da Coruña.

Así mesmo, a expedición material do título incluírá información sobre o programa de doutoramento cursado, de acordo co establecido ao respecto no Real decreto 1002/2010, do 5 de agosto, sobre expedición de títulos universitarios oficiais.

As persoas interesadas poderán pedir tamén, sempre que a universidade estiver en condicións técnicas de expedito, un suplemento europeo ao título (SET).

Para os programas Erasmus Mundus e títulos conxuntos estarase ao disposto nos convenios e acordos establecidos e a lexislación estatal en materia destes títulos.

O título de doutor/a do alumnado estranxeiro producirá todos os efectos que lles outorga a lexislación vixente.

### **Capítulo 13. Dereitos dos doutorandos**

#### **Artigo 46. Dereitos específicos dos estudantes de doutoramento**

1. Ademais dos dereitos recoñecidos por norma estatal, autonómica ou da propia universidade, o estudiantado de doutoramento teñen os seguintes dereitos específicos:

A recibir unha formación investigadora de calidade, que promova a excelencia científica e atenda á equidade e a responsabilidade social.

A contar cun titor ou titora que oriente o seu proceso formativo e mais un director ou directora e, no seu caso codirector/a ou codirectores/as, que supervisen a realización da tese de doutoramento.

A procura da integración dos doutorandos en grupos e redes de investigación.

A coñecer a carreira profesional da investigación e a que se promovan oportunidades de desenvolvemento da carreira investigadora.

A participar en programas e convocatorias de axudas para a formación investigadora e para a mobilidade nacional e internacional.

A contar co recoñecemento e a coñecer os mecanismos de protección da propiedade intelectual a partir dos resultados da tese de doutoramento e dos traballos de investigación. As publicacións resultantes dos traballos rexeranse pola normativa de propiedade intelectual.

A ser considerados como persoal investigador en formación, de conformidade co Estatuto do Persoal Investigador, coa Carta europea do investigador e no que se estableza na Lei da ciencia, da tecnoloxía e a innovación (LCTI).

A ter representación nos órganos de goberno como persoal investigador nos termos establecidos nos Estatutos da Universidade e nos regulamentos e normas electorais da universidade.

A participar no seguimento dos programas de doutoramento e nos procesos de avaliación institucional, nos termos previstos nos sistemas de garantía da calidade e demais normativa vixente.

Os estudantes das ensinanzas de doutoramento internacional poderán participar en programas de mobilidade durante o período de investigación do seu programa de doutoramento. A duración destas estadias será a establecida na súa normativa reguladora.

Ter dereito de acceso ao campus e ás súas instalacións de uso público ou colectivo, de acordo coas regras para tal efecto establecidas pola universidade.

2. As escolas de doutoramento no seu regulamento de réxime interno poderán desenvolver e concretar os dereitos e deberes contidos neste regulamento.

3. No compromiso documental asinado pola universidade e o doutorando farase referencia a estes dereitos e ao sistema e procedemento de resolución de conflitos, así como consideraranse os aspectos específicos relativos aos dereitos de propiedade intelectual ou industrial que poidan xerarse no ámbito do concreto programa de doutoramento.

## **Capítulo 14. Obrigas dos doutorandos**

### **Artigo 47. Obrigas dos doutorandos**

Son deberes dos estudantes de doutoramento os establecidos no artigo 13 do Real decreto 1791/2010, do 30 de decembro, polo que se aproba o Estatuto do Estudante Universitario e os establecidos no Estatutos da Universidade e, no seu caso, os establecidos para o persoal investigador en formación.

Os doutorandos comprométese a desenvolver as actividades formativas programadas nos estudos de doutoramento, a documentalas no rexistro individualizado de control, e a levar a cabo a investigación obxecto do plan de investigación, baixo o seguimento e a supervisión do/a titor/a e o/a director/a da tese.

Así mesmo, deben asumir as seguintes obrigas que a título meramente enunciativo, se concretan en:

Realizar as actividades formativas, de obrigada realización e superación en cada programa.

Asinar e respectar o compromiso documental.

Atender, observar e seguir as indicacións e recomendacións que lle fagan o seu titor/a e/ou director/a de tese en relación coas actividades formativas programadas ou non no doutoramento.

Informar regularmente ao/á titor/a e/ou director/a de tese da realización de tales actividades e da evolución do traballo de investigación, dos resultados obtidos, e dos problemas que lle puideren xurdir no seu desenvolvemento.

Presentar nos prazos establecidos pola comisión académica o plan de investigación e o documento de actividades individualizado, para someterse a avaliación da actividade realizada no prazo previsto pola normativa.

Dedicar á realización do programa de doutoramento, incluída a tese, o número de horas que se estableza no compromiso documental.

Someterse ás regras de organización e uso de bens e equipos do centro onde realice a investigación

Cumprir os prazos e os deberes establecidos no presente regulamento.

#### **Disposición transitoria primeira. Doutorandos conforme a anteriores ordenacións**

Aos doutorandos que na data de entrada en vigor deste regulamento estivesen matriculados en tutela académica de tese de doutoramento nun programa de doutoramento na Universidade da Coruña regulado por ordenacións anteriores aplicaráselles as disposicións reguladoras do doutoramento e da expedición do título de doutor/a polas que comezaran os seus estudos. En calquera caso, seralles de aplicación todo o relativo ao tribunal, defensa e avaliación da tese e dispoñen ata febreiro de 2016 para a presentación e defensa da tese. Unha vez que transcorra este prazo sen que se produza a defensa da tese o/a doutorando/a causará baixa no programa.

En todo caso non lles será de aplicación o disposto no artigo 10 no relativo aos requisitos que se deben cumprir para ser director/a de tese de doutoramento.

#### **Disposición transitoria segunda. Programas de ordenacións anteriores**

Os programas de doutoramento regulados por ordenacións anteriores quedarán completamente extinguidos antes do 30 de setembro de 2017, sen que se poida ofertar matrícula de novo ingreso en concepto de tutela académica de tese de doutoramento a partir do curso 2013/14.

**Disposición transitoria terceira: codireccións de teses de doutoramento** (introducida polo Consello de Goberno do 23 de abril de 2013)

Establécese un período transitorio de tres anos durante os cales, no caso de teses con mais dun director, un dos codirectores da tese poderá non cumprir os requisitos establecidos para os directores no artigo 10 deste regulamento, sendo suficiente que os outros codirectores acrediten experiencia investigadora segundo o artigo 10 deste regulamento. Os tres anos empezarán a contar a partires do día seguinte ao da entrada en vigor desta modificación.

#### **Disposición transitoria cuarta: Das escolas de doutoramento**

En tanto non se aprobar a creación da/s escola/s de doutoramento na UDC, o órgano responsable dos estudos de doutoramento a que se alude neste regulamento será a Comisión de Doutoramento da Universidade da Coruña que asumirá as súas funcións. Unha vez creada/s a/s escola/s de doutoramento na UDC e ata a constitución do seu comité de dirección, as funcións do dito comité serán asumidas pola Comisión de Doutoramento xunto co director/a da/s escola/s de doutoramento na UDC.

#### **Disposición adicional primeira. Normas de permanencia nos estudos de doutoramento**

A normativa de permanencia dos estudantes en estudos de doutoramento na Universidade da Coruña rexerase polo disposto no capítulo 7 do presente Regulamento.

#### **Disposición adicional segunda. Situacións non consideradas no presente regulamento**

As situacións excepcionais non reguladas polo presente regulamento, serán resoltas polo órgano responsable dos estudos de doutoramento na Universidade.

#### **Disposición derogatoria única. Derogación normativa**

Queda derogada a Normativa para estudos de doutoramento aprobada no Consello de Goberno do 22 de maio de 2008, e o Regulamento de estudos de doutoramento da UDC, aprobado no Consello de Goberno do 30 de outubro de 2008 e modificado por acordo do Consello de Goberno do 20 de decembro de 2011.